


夢占類考

七之八



漢書門		九	六	六	類
一	二	三	四	號	
六	一	三	四	架	冊

內閣文庫		漢	書
三	九	六	六
六	一	六	四
函	架	冊	號
一	六	四	類

內閣文庫	
番號	漢 9664
冊數	6 (4)
函號	306 12



A 1 2 3 4 5 6 M 8 9 10 11 12 13 14 15 B 17 18 19

Kodak Gray Scale



© Kodak, 2007 TM: Kodak



夢山類考卷七

漢草文庫

長洲張鳳翼伯起編

爵祿部

太子欒卽位於廟

宋元公將為公故如晉

魯昭公為季氏所逐宋元公欲納之

夢太子欒卽位

於廟已與平公服而相之曰召六卿公曰寡人不佞不能

事父兄以為二三子憂寡人之罪也若以群子之靈獲保

首領以沒唯是楸柎所以藉幹者

楸柎棺中簠林也幹骸骨也言棺斂之禮所以

薦藉骸骨者




請無及先君仲幾

宋大夫

對曰君若以社稷之故私

降昵宴群臣弗敢知若夫宋國之法死生之度先君有命

爵祿



之

矣群臣以死守之弗敢失隊臣之失職常刑不赦臣不忍其死君命祇辱宋公遂行己亥卒於曲棘左傳

牢之坐其處

王恭舉兵赴京師上表以討王愉司馬尚之兄弟為辭夜夢劉牢之坐其處曰謂牢之曰事尅即以卿為北府因遣牢之率帳下督顏延先據竹里元顯使說牢之唱以重利牢之乃斬顏延以降恭敗朝廷即以恭位號處牢之如所

夢云晉書

遣使拜命龍驤將軍

秦主苻健之入關也夢天神遣使者朱衣赤冠命拜苻堅

為龍驤將軍健翌日為壇於曲沃以授之健泣為誓曰汝祖昔受此號今汝復為神明所命可不勉之北史

服袞衣升座

姚襄之寇洛陽也夢其弟萇服袞衣升御座諸酋長皆侍立明日謂將佐曰吾夢如此此兒志度非常或能大起吾族及襄死至太和九年萇自稱秦王建年號稱制行事北史

身不得傳世封

魏宗室弼嘗夢人謂之曰君身不得傳世封其紹先爵者長子紹遠也紹遠即暉業字也弼覺以告暉業後為季父

尚書僕射麗因于氏親寵遂奪弼王爵橫授兄子誕弼乃
托疾入山布衣蔬食至弼卒暉業訴之乃復王爵如所夢
云北史

王必維之

梁元帝始在潯陽夢人曰天下將亂王必維之及踐祚乃
為魏所滅梁書

改封中山

梁始興王蕭憺夢改封中山王策授如他日意頗惡之數
旬而卒追贈之典及焉梁書

升於台鉉

陳世祖嘗夢章昭達升於台鉉及旦以夢告之後以功
授鎮前將軍開府儀同三司一日侍讌世祖顧昭達曰卿
憶夢否何以償夢昭達對曰當効犬馬之用以盡臣節自
餘無以奉償陳書

召為主簿

劉赤斧者夢蔣侯召為主簿期日促往廟陳請毋老子弱
情事過切乞蒙放恕會稽魏過多材藝善事神請舉過自
代因叩頭流血廟祝曰特願相屈魏過何人而有斯舉赤
斧固請終不許尋卒

興俊令

劉晝常夢貴人若吏部尚書者補晝為交州興後令寤而
密書記之未幾卒後旬餘其家幼女鬼語聲似晝云我被
用為興後縣令得暇暫來倏辭別云

北史

二女報中第

唐鍾離介寓長安夢二女揖之曰吾家孟溪君今中第尹
吾邑矣已而果如其言介既至仙居求其跡廟而祀之名
曰慈感

五品文書已過天曹

戴胄素與沈裕善胄以唐貞觀七年死至八年八月裕在
州夢胄着故弊衣顏容甚頓見裕悲喜裕問公生平修福

今者何為答曰吾昔誤奏殺人吾死後他人殺羊祭我由
此二事辯答辛苦不可具言今亦了矣因謂裕曰吾平生
與君友善竟不能進君官位深恨于懷君今日得五品文
書已過天曹相助欣慶故以相報言畢而寤九年春裕將
歸江南行至徐州奉詔書授裕五品為婺州治中

冥報記

任調拜相

張鎰大曆中守工部尚書判度支因奏事稱旨代宗面許
宰相恩澤甚厚張曰冀望而累旬無信忽夜夢有人自門
遽入抗聲曰任調拜相張公驚寤思中外無其人尋譯不
解有外甥李通禮者博學多智張因召令研其理李沉思

良久因賀曰舅作相矣張詰之李荅曰任調反語饒甜饒甜無逾甘草甘草獨為珍藥珍藥反語即舅名氏也張甚悅俄有走馬吏報曰白麻下公拜中書侍郎平章事集異記按反語解夢殊支離李特計張將大拜故強解以悅之耳

此州刺史

崔龜從以大理評事從事河中府一夕夢與人入官署見有人當陽儀衛甚盛擗管視狀若決事者因疾趨及階拜唯而退行及西廡下牖間文簿堆積於大格若今之吏舍有吏抱案而出因迎問之此當是陰府某願知祿壽幾何吏應曰二人後且皆為此州刺史無勞閱簿也及出門又

見同時從事席地而樗蒲寤大異之明日入公府話於同舍皆以為吉解曰君夢得君而又見樗蒲蒲者蒲也君後當如主公節臨蒲州矣開成中出為宣州去前夢二十年矣至郡吏告曰敬亭神實州人所嚴奉每歲無貴賤必一祠焉以故廉使輒備禮祠謁龜從時病至秋乃愈因謁廟及門恍然屏上有畫人抱案而鞠躬乃夢中吏也龜從後入相罷為少保歸洛卒

十年作襄刺

高元裕於太和三年任司勳員外郎寓宿南宮晝夢有人告曰十年作襄刺史既寤私異之因援毫以隱語記于廳

之東楹掩暎處曰大三寤襄刺十年泊開成三年為御史中丞遂謂夢固虛耳是後出入中外敷歷貴位至大中二年由天官尚書授鉞漢南自題記後解署補葺亦屢矣且謂楹上字無復存也及與好奇士同往觀之則毫翰煥然獨存高因屈指以今之年加曩之十乃二十年矣

集異記

光晟拜相

張光晟家甚微而有才用性落魄嗜酒壯年為潼關卒屢被主將鞭笞因奉役至華州盛暑驅馳心不能平過嶽祠遂脫衣買酒致奠金天王朗言曰張光晟身負才器未遇知己富貴貧賤不能自料惟神聰鑒當賜誠告禱訖因飲

大醉晝寢于碑堂忽夢傳聲云喚張光晟迫感甚急即入一府署嚴邃異常導者云張光晟到拜跪訖遙見當廳貴人有如王者謂之曰欲知官祿但光晟拜相則天下太平言訖驚寤冷汗後積勞官至司農卿及建中德宗西狩光晟為朱泚所縻奉泚甚力每有戰常在其間及神慶之陣泚拜光晟僕射平章事統兵出戰大敗而還天下遂太平

友寤神告云

集異記

何僕射

何致雍者賈人之子也幼而爽俊好學嘗從其叔父泊舟皖口其叔夜夢一人若官吏乘馬從數僕來往岸側徧閱

爵祿

卷之七

舟船人物之數復一人自後呼曰何僕射在此勿驚之對
曰諾既寤徧訪鄰舟皆無姓何者乃移舟入深浦中翌日
大風濤所泊舟皆沒唯何氏存叔父乃謂致雍曰我家世
貧賤吾復老矣何僕射必汝也善自愛致雍後於湖南為
節度判官會楚王殷自稱號以致雍為戶部侍郎翰林學
士後楚王希範嗣立復去帝號以致雍為節度判官檢校
僕射稽神錄按此殷僭號皆天討所當加也其所爵者非
天命可知矣而光晟之相致雍之僕射何足兆夢豈
造物固戲之耶

名係葛瓚食祿全蜀

韋臯為張延賞塔落魄不得志一夕夢神人語云吾子名

係葛瓚祿食全蜀富貴將及他日毋忘葛瓚後節度全蜀
乃作南宮閣四十範金刻石自製碑文志之蓋臯本命丁
卯屬葛瓚也蜀異記

二郎祿料

吳越元璪次子文奉以蔭為中吳軍衙內都指揮使夢在
郡登烏鵲橋見禽獸充牣城中旁一人云此二郎祿料也
後改節度副使幾三十年及嗣元璪為節度使累加至檢
校太尉中書令壽八十一蘇州志

兩季俸支牒已行

張轅自奉天尉將調以李錡在浙西與已有舊欲往干謁

之未至夢人送官誥至云張轅可袁州新喻令轅言已曾
為赤尉不應作此官不肯受其人曰兩季俸支牒已行遂
委之而去及轅見錡錡以轅選限尚遠勸署毘陵鹽鐵場
官轅以貧故強受之既至視簿書所用印乃新喻廢印也
四月領務九月而罷支兩季俸云

河南尹

王播登第後夢為河南尹視事有二客至東西坐東者曰
崙邦如何處置西者曰已科決遍出界訖覺而書于誥牒
後別紙上後二十年果除河南尹既至三日洛陽令與分
司郎官偕至問荅一如所夢蓋郎官奴竊物而逃送邑邑

斷如此播命取官誥後所志驗之相與歎異云

夢談

長白山主

歐陽脩次子仲純夢為長白山主明年卒

呂丞相

梅詢坐議天書出知濠州夢人告曰呂丞相至矣既而呂
夷簡通判州事待之甚厚其後援之廢斥中登貴顯皆夷
簡力焉

宋史

龍首山人

楊寘在慶曆年舉進士第一授將作監丞通判潁州未至
官卒初其友夢寘作龍首山人寘自謂龍首我四冠多士

也山人無祿位之稱我其終是乎已而果然 宋史

神人畀以騎都尉

喬執中性仁厚歷官至刑部侍郎後復以寶文閣待制知
鄆州執中屢典刑獄雪活以百數一夕夢神人畀以騎都
尉詰曰為客言之少焉談笑而逝時年六十三 宋史

宰相項安節

神宗嘗夢入大第有植牌以金填字曰宰相項安節寤而
求之乃太學生也慈聖解之曰項安節即吳充也頸有瘤
焉 后山談叢

明日有宰相來

文潞公彥博少時從其父赴蜀州幕官過成都入江濱廟
觀畫壁官接之甚勤且言夜夢神令灑掃祠庭明日有宰
相來公豈異日之宰相乎潞公笑曰宰相非所望若為成
都當令廟室一新慶曆中潞公以樞密直知益州謁廟方
經營改造江中忽漲大木數千章蔽流而下取以為材廟
成壯甲天下信乎事有前定而鬼神能窺其機也 聞見錄

樞密直學士

羅彥國累試不第祈夢於梓潼神夢神謂曰已除君樞密
直學士矣明年彥國復下第投牒乞進舉推恩授密州文
學蓋密學之應也 夢談

賜五子科第

宣和中方臘犯諸暨其士人黃汝楫以財物一萬緡贖賊所掠士女千人夜夢神告曰上帝以汝活人多賜五子科第其後子開閣開門闔皆登第焉

閱登科集

宋孫洪與同舍生游太學生得家書秘不示洪洪詰之不巳出書示之書云昨夜夢至一官府若閱登科集汝與孫洪皆列名籍中其孫洪名下有朱字云於某年不合與人寫離婚書上天譴之不得過省洪愕然生曰公果有此事否洪曰有之及就試生果中高第而洪不得選暨生西歸

為尋夫婦合其已離明年洪始釋褐

馮侍郎在此

馮京少孤寓武昌縱飲不羈一夕醉臥郊外溪邊有漁者罷漁艤舟而寢有人叱之曰馮侍郎在此安得不避漁者驚起登岸見一人衣冠熟寢草間詢之知為馮也因請臥舟中以避風露具以夢告且曰秀才他日貴顯幸無忘馮睡至曉共載入郡其後馮貴使訪漁舟不復見

澠水燕談

侍郎也

熙寧初黃庭堅宿石塘寺寺有鬼靈異僧敬信之一夕夢曰分寧黃刑部至僧曰侍郎乎尚書乎曰侍郎也及南遷

年已六十親故以為憂黃曰宜州者所以宜人也且石塘
鬼侍郎之言豈欺我哉而黃竟沒於宜州誰謂鬼可信也
聞見錄

陽明府侍郎

陸洎為淮南副使和雅重厚時輩推之副使李承嗣尤與
之善乙丑歲九月承嗣與諸客訪之洎從容曰某明年此
月當與諸客別矣承嗣問其故荅曰吾向夢人以一騎召
去止大明寺西可數里至一大府署曰陽明府入門西亭
復有東向大門下馬入一室久之吏引立階下門中有二
綠衣吏捧一案案上有書一紫衣秉笏取書宣云洎三世

為人皆行慈孝功成業就宜授此官可封陽明府侍郎判
九州都監事來年九月十七日本府上事復以騎送歸遂
寤靈命已定不可改矣諸客皆嘻至明年九月十六日承
嗣復與向候之客詣之謂曰君明日當上事今何無恙也
洎曰府中已辦明當行也承嗣曰吾嘗以長者重君今無
乃近妖乎洎曰唯君與我有緣他日必當卜鄰承嗣默然
而去明日遂卒葬于茱萸灣承嗣後為楚州刺史卒葬于
洎墓之北云 稽神錄

與汝余都主簿

浦城李景韓謁城隍廟求子夢人謂曰大王與汝余都主

簿因而生男遂名之曰夢祥弱冠登第任余都主簿到官
謁城隍神廟見有一判官倒于堦下從者見其貌似夢祥
為言之夢祥問廟祝此判官倒幾年云已經二十六年時
夢祥年正二十六憮然曰殆我也倩工粧塑工畢而夢祥
卒夢談

中丞推勘

紹興中辛次膺為湖襄提刑至武昌岳少保飛通謁執辛
手曰前夕夢中丞推勘驚寤不敢告人而津吏適報公至
公他日必為獨坐願公救護之後數年岳罷副樞奉朝請
故部將王貴迎秦檜意告飛謀叛繫大理

何鑄勘其事方悟所夢非辛乃新除中丞也

夷堅志

居挂金書狀元坊

黃公度鄰人王氏夢其居挂金書榜曰狀元坊自謂子孫
必應兆每誇語於里閭久而益貧所居歸於黃氏不數日
公度捷書到

及第作十三魁

馬洵既赴御試夢人告之曰子欲及第須作十三魁洵歷
數其在太學及預薦送止作十二魁心甚憂之意疑復黜
落也逮賜第魁天下果十三魁

春渚記聞

宣教郎

宋廖德明少夢懷刺往謁大乾廟廡下謁者索刺出諸袖視其題字云宣教郎廖遂驚覺後登第改秩以宣教郎宰閩諸迂者及門思前夢恐官止此不欲行親朋勉以不足芥蒂德明乃之任後把麾持節官至正郎

江南秀才來見

楊吳之尅豫章也中書舍人徐善與妹為一軍校所虜既定軍校請以禮聘之善自以宦族不當與戎士為婚固不許校乃強納幣竟虜之而去善即詣楊都求見楊渥而訴之時渥初嗣藩服府廷甚嚴僭擬王者布衣游士旬歲不得一見而善始至白沙渥夜夢人來言曰

善將來見公今在白沙逆旅矣其人良士也且有情事公可厚遇之且即遣騎迎之既至禮遇甚厚且問所欲言善具白其妹事即命贖歸時欽州刺史陶雅聞而異之因辟為從事

稽神錄

吏部都水司

吳員外瑞初登第其同年吳洪夢瑞牙牌上刻吏部都水司初不解後瑞選南京吏部考功主事竟轉工部都水司員外始驗夢云

夢談

稱黃狀元

鄱陽士人黃瀛宣和間在太學負俊聲屢夢人言黃狀元

因自待不淺時與交友言之然每入舉場輒不偶紹興八年以免舉赴省試而黃公度魁多士瀛始悟歎曰二十年夢黃狀元命乃為他人所奪怏怏而歸久之僅得特奏名攝官而卒

夷堅志

來春及第

柳璟知貢舉有國子監明經晝夢徙倚于監門有一人負衣囊訪問其姓氏明經語之其人笑曰君來春及第明經遂邀入長興里畢羅店常所過處店外有大競驚曰差矣夢覺遽呼鄰房數人語其夢忽見長興店子入門曰郭某與客食畢羅計二斤何不計直爾

之且隨驗所夢相其榻器宛如夢中乃謂店主曰我與客俱夢中至是客豈食乎店主驚曰初怪客前畢羅悉完疑其嫌置蒜也來春明經與鄰房三人夢中所訪者悉上第

酉陽雜俎

官帶陽字

員外郎樊系未應舉前一年嘗夢及第榜出王正卿為榜頭一榜二十六人系官帶陽字明年方舉登科之後果是王正卿為首人數亦同系又自校書郎調選吏部侍郎達奚珣深器之一注金城縣尉系不受珣云校書得金城縣尉不作更作何官系曰不敢嫌畿尉但此官不是系官珣

酉陽雜俎

云合得何官系云

陽縣尉 定命錄

帶陽字珣歎曰是命也因補

拜官前後

潘玠與趙自勤同選俱送名上堂而官久不出玠云已作
夢官欲出矣夢玠與自勤同謝官玠在前行自勤在後及
謝處玠在東自勤在西相視而笑後三日官出果玠為御
史自勤為拾遺同日謝初引玠在前先行自勤在後入朝
則玠於東立自勤於西立兩人遂相視而笑如其夢焉

命錄

官誥不到

江南大理司直邢陶夢人告云君當為涇州刺史既而為
宣州涇縣令考滿復夢其人告云宣州諸縣官人來春皆
替而君官誥不到邢甚惡之至明年春罷歸有薦邢為水
部員外郎牒下而所司失去復請二十餘日竟未拜而卒

稽神錄

李彥榜下及第

金李世弼從外家受孫明復春秋貞祐初三赴廷試不第
推恩授彭城簿鬱鬱不得志遂復求試一夕夢在李彥榜
下及第時計偕無此人其子昶年方十六已能為程文乃
更其名曰彥至定興二年父子廷試彥果以春秋中第二

晉書

卷之七

甲第二人世弼中第三

三人

長吳正官

元于文傳方成進士夢入選掛名為長吳正官覺而笑曰我吳人安得作長吳二縣正官必無此理初授官階承事郎昌國州同知益笑前夢之不足徵也次當改選乃授平江路長洲縣尹無何改知烏程轉婺源州知州自以為前任長洲偶與夢符耳今已升知州安得再為吳縣正官既而調吳江州知州亦長吳正官也

姑蘇志

彭岳二元

正統戊辰狀元則彭學士時而會元則岳學士正也先是

丁卯冬湖廣永濟縣須知官在途夢開黃榜第一名彭時國子監生此官至京向永濟監生張端本言之端本以告彭彭曰夢中事何足信又一人謂岳曰吾昨夜夢兄魁多士可賀岳曰若夢可信昨有人夢彭時作魁矣其人戲曰會試廷試各有一魁焉知非二君已而果然

狀元至我家

孫學士賢赴會試途中投客店主人具飲食致敬於孫孫疑其家有他會問之主人云昨夜夢狀元至我家今日必應此夢矣是科下第歸來科果及第

狀元錄

一舉中雙元

李侍郎旻與王尚書華同鄉試考官取華爲解首監臨謝御史嫌華白衣乃更李主文者夢中得一舉中雙元之句後王華辛丑狀元李旻丙辰狀元果符夢云 狀元記事

科第與吳寬同

松江錢翁中子名福生數歲矣夢三女來謂曰汝子科第當與蘇州吳寬同因至蘇訪吳寬吳時尚困庠舍然人皆稱其德優學博乃曰吾兒便不得科第得名齊吳君足矣及吳狀元及第而福亦以狀元發跡 客座新聞

登第在狀元前

松江張進士黼未第時嘗夢人謂曰汝登第在狀元前覺

而思之世豈有科名先狀元者吾殆無此望矣及丁未會試名在十五鉛山費學士宏名在十六是科宏狀元及第計得夢時費尚未生也 震澤長話

劉登費狀元榜

劉進士良初中景泰丙子湖廣鄉試既而十赴春闈潦倒衰白人皆鄙之嘗自誇曰進士必爲我有但時未至耳凡赴試必徧訪天下舉人姓費名宏者屢科不得及成化丁未聞鉛山有費宏乃至其邸飲酒沾醉撫掌大笑謂宏曰今科狀元必子吾三十年前夢神告曰汝登進士必費宏作狀元累科覓子今得之矣及開榜費與劉皆得第而廷

試費果狀元 客坐新聞

來科狀元

呂少宗伯柵至孝方會試 喪痛哭草履步至家途中夢
有人報來科狀元

折臂太守

詳人身部劉之遴

正鼻郎

詳人身部徐郎中

位至正郎

詳什百部查道

石轉三匝至三公

詳陵墓部陽休之

旂常部

旗旛 大幡出指端

劉仁恭自言夢大幡出指端年四十九當建旄節李國威
忌之補景城令後果建節云

旛花羅列空中

大同元年九月六日釋慧約現疾謂弟子曰我夢四部大
衆旛花羅列空中迎我凌雲而去福報當訖至十六日勅
遣舍人徐儼參疾荅云今夜當去至五更合掌便入涅槃

龍旂豹尾

陳劉皇后年十七歲時裴方明為子求婚酬許已定后夢先有迎車至猶如常家迎法不肯去次有迎車至龍旂豹尾有異於常后喜而從之既而與裴氏不成婚竟嬪於帝

陳書

旌旗迎光王

太子賓客盧真有猶子曾為沙門會昌中沙汰歸俗廕補為光王府參軍一日夢前師至其家而問訊焉盧告官非其願常思落髮再披緇褐師曰汝誠有是志像教興復非晚也語未竟俄回面見日月旌旗千乘萬騎喧言迎光王

卽皇帝位未幾武帝崩光王果卽皇帝位至是竟符其事焉

宣室志

李衛公請造旗幡

乙未歲契丹據河朔晉師拒于澶淵天下騷然疲於戰伐翰林學士王仁裕奉使馮翊路由于鄭過僕射陂見州民及軍營婦女填咽於道路皆執錯彩小旗于插於陂中不知其數詢其居人皆曰鄭人比家夢李衛公云請多造旗幡置於陂中我見集得無數兵為中原剪除戎寇所乏者旌旗耳是以家家獻此幡幟初未之信以為妖言旬月間擊敗胡虜及使迴過其陂使人訪于草際旗幡存者尚多

旌常

玉堂閑話

旌旗鶴鴈降庭

宋富弼母韓有娠夢旌旗鶴鴈降其庭云有天赦已而生弼為宋室賢相

黃旗插門

孫學士賢未第之先夢金甲神人持黃旗插其門有狀元二字至廷試果首擢

立黃旗於門上

平江士人姓潘初名某其母夢神人立黃旗於門上乃易名夢旗復自夢神曰當用交龍為旂之旂遂更夢旂是歲

果登科 夢談

幢輶自天下

張秋官鳳翔舉進士角尚升聲大起一旦病疽告休沐夢幢輶冉冉自天下廣樂導之若迎已者及病之革也起端坐索紙筆掃詩一十八章言意漫渙弗次漸昏漸竭末詩有一章三句者一章一句二句者投筆而氣絕矣時部察李夢陽王崇文經紀其喪事既以之歸葬洵陽夢陽復上孝廟言鳳翔老母孤兒幼妻不免凍餒溝壑乞追繹鳳翔犬馬之微勞體古敝帷敝蓋之義查例勅有司月給米一石養贍終其母妻之身奏下吏部准行 空同集

旂常

卷之二

三

瓜錘 前列瓜錘

唐侍講臯嘗夢前列瓜錘一對未嘗語人及廷試果第一蓋狀元傳臚後以黃蓋瓜錘送歸第故也

印 六印加劍上

宋凌策初登第時夢人以六印加劍上遺之其後知益州往劍外凡六任云 宋史

帶印綬登樓

詳棟宇部張奐

碑 得古斷碑

後晉寶雲寺僧一日夢於舊寺基水際得古斷碑云寺南

高基乃顧野王脩輿地志處也明日果得碑乃於基上建

野王祠元成廷珪詩云塵銷壞壁書千卷土蝕殘碑字幾

行正謂此也 松江志

宰相碑

杜鴻漸之父名鵬舉父子而似兄弟之名盖有由也鵬舉嘗夢有所之見一大碑云是宰相碑已作者金填其字未者刊名於柱上因問有杜家兒否曰有任自看之記得柱下有烏扁旁曳脚而忘其字乃名子為鴻漸後果拜相

瘞碑豎碑

丘吏部鵬初中嘉靖丁酉應天鄉試夜夢數十人昇一碑

若題名記然中有丘名瘞之無何錄入世廟惡其策以
祀戎發問語涉大禮遂逮試官黜舉子不得應制至庚子
冬復夢數十人發此碑豎之且囑丘以得第後勿作官作
官當不壽既寤向人談之未幾有詔許前科應天舉人
入試丘遂中會試以夢故不敢試大廷歸三年復試
大廷釋褐郎署不久轉吏部竟卒

刻碑舊文磨沒

詳黃冠部許旌陽

榜春榜

于觀文入試夢人以軸文與之曰此春榜也可收之既覺

自解曰令我收榜吾其瑣榜乎放榜果然該聞錄

笏積笏如山

章得象始生其父與夢其庭積笏如山後得象進士及第

拜相封郟國公宋史

金龜吞金龜

劉贊夢吞金龜文思大進為孟蜀學士一日夢吐龜未幾
卒

珮解珮帶履

樂彥貞嘗夢解珮帶履而行既寤曰此神告我下將有悖
逆乎已而果有軍亂

旆常

盤囊 斷盤囊

鄧攸為淮南太守夢行水邊見一女在後來斷盤囊者以為水邊女是汝字斷盤囊者是新虎頭也不作汝南當汝陰果選汝陰 王隱晉書

牌扁 扁中釘丁

宋徐儼夫幼夢家有狀元扁中釘以丁儼夫狀元及第後與丁謂大不合

牌扁

初崑山張安甫在祁州嘗夢得一狀元牌扁明日偶因公事出至橋上適見一木浮水面問居民皆不知所自就令

人作牌扁自書明倫堂三字寄歸崑山學中以寓期祝之意乙卯秋恭靖朱公希周夢取此牌扁回家以為鄉貢之兆已而果得狀元云

辛巳狀元牌扁

楊脩撰惟聰在京師崇文坊夢迎金字辛巳狀元牌扁來扣之何往曰送與固安楊秀才覺自喜但疑是歲非試期既而乙卯庚辰鄉會聯捷因武宗南巡未暇廷試至肅皇登極舉之實辛巳歲也

牌換字

宗伯瞿公景淳夢有人持一牌示之四圍皆五彩粧飾如

雲中寫案首二字須更此牌中換會元二字頃又換榜眼
二字及發考案至登科名皆不爽云

移狀元扁

張殿撰元怵居羅宗伯萬化同里對戶羅既大魁天下張
尚未第一夕夢移其扁於家及廷試果以狀元及第云

簡
方簡一片

商文毅輅應浙江乙卯鄉試與姚文敏夔同舟夔夢一吏
持方簡一片至舟連呼解元者二簡上有商輅二字夔問
曰我中否其吏轉過簡後示之又有姚夔二字是科商第
一戊午姚第一

神人朱衣象簡

詳醫藥部陳太后

籤

入監領班籤

費學士宏之上春官也伯父瑄方以都水主事治呂梁貽
之書曰汝脫下第毋南歸宜入北監讀書丙午還宏詢之
曰伯父何以知宏之弗第而必令入北監也瑄笑曰此爾
遠到之兆也吾嘗夢汝入監領班籤籤乃彭文憲故物也
文憲嘗游北監中狀元矣汝勉之至成化丁未果狀元及
第狀元錄

鹵簿
犯鹵簿應髡

名姓

卷之七

詳人身部蘇韶

鹵簿入廁中

詳棟宇部沈慶之

冕元伯玄冕垂纓

詳彙倫部范式

名姓部

命子名虞

周武王與叔虞毋會時夢天謂武王曰余命女生子名虞
余與之唐及生子文在其手曰虞故遂應命之曰虞武王
崩成王立唐有亂周公誅滅唐成王與叔虞戲削桐葉為

珪以與叔虞曰以此封若史佚因請擇日立叔虞成王曰
吾戲之耳史佚曰天子無戲言言則史書之禮成之樂歌
之於是遂封叔虞於唐史記

請待公孫彊

曹人或夢衆君子立于社宮而謀亡曹曹叔振鐸請待公
孫彊許之旦而求之曹無之戒其子曰我死爾聞公孫彊
為政必去之及曹伯陽即位好田弋曹鄙人公孫彊好弋
獲白鴈獻之且言田弋之說說之因訪政事大說之有寵
使為司城以聽政夢者之子乃行彊言霸說於曹伯曹伯
從之乃背晉而好宋宋人伐之晉人不救宋滅曹執曹伯

名姓

及司城彊以歸殺之左傳

昌明為字

簡文帝見識云晉祚盡昌明及李后懷孕夢神人謂之曰
汝生男以昌明為字及產武帝東方始明因以昌明字之
簡文帝後悟乃流涕晉祚自此傾焉晉紀

俾壽且貴

宇文貴母方孕夢老人抱一子授之曰賜爾是子俾壽且
貴及生形類所夢故名之曰貴而以永貴字之北史

可名青建

齊董賢明為越騎校尉妻宋氏有娠夢有人語之云爾必

生男體上當有青誌可名為青建及生男如言名之後青
建十四西州辟主簿建元初為水曹參軍

二人姓李乞命

梁南郡太守劉之亨嘗夢二人姓李詣之亨乞命之亨不
解其意明日有人遺生鯉兩頭之亨曰必夢中所感乃放
之其夕夢二人謝恩云當令君延一算渚宮舊事

自稱子瑜

涼文王張駿夢一人鬢眉皓白自稱子瑜曰地上之事付
汝地下之事付我王寤問之有侯子瑜先死得其曾孫亮
以為祁連令煥煌錄

李故言及第

元和六年韋詞為宛陵廉使七月夢一人投刺視之瞭然見題其字曰李故言俄有人言明年狀頭詞既寤以名中少有故字疑之至八月果有取解舉人具名投刺一如夢中但故為固耳詞乃曰足下明年必擢第仍居眾君之首無何果為榜首

爾改名畢

杜牧嘗夢人告曰爾改名畢牧以為不祥其年果卒

諸門悉署權字

唐程執恭領滄涼節度使嘗夢諸門悉署權字乃改名權

後朝廷詔鄭權代之

唐書

吞芝名子

唐申泰芝洛陽人其母楊氏夢人與芝吞之曰以名子已而得子遂名泰芝稍長遊南岳遇異人授金丹白晝冲舉

江陽部民李珏

唐丞相李珏節制淮南一夕夢入洞府見石壁填金書姓名內有李珏字方自喜有二仙童云此乃江陽部民李珏耳既寤詢之民間果有廣陵人李珏者年近百歲究其生平所為以販穀為業每斗惟求利兩文有糶糶者即授以升斗俾自量之意以此得果報云

廣陵志

名姓

職官姓名

劉守光為燕王有尼出入其母所張殷袞托尼求一文學
不得一夕殷袞夢入衙署內多簿書而無守攝乃潛升廳
事見案上大簿云職官姓名乃檢河北道見守光及文武
職掌莫不有名便捉筆自書文學張殷袞但倉卒墨色頗
淡即驚覺因識之論語策後翌早守光遣人齎一牒與殷
袞即文學牒也劉母讓守光曰我為尼數言不與今何忽
與之守光曰兒昨夢朱衣吏來言張殷袞已注下為文學
訖故與之也殷袞得牒視姓名墨色果淡晉天福中其二
希永嘗出父論語後所記示人云

檀香樹為名

劉審義夢一人引上檀香樹謂劉曰君速登以為名覺後
因改名檀無何授殿中侍御史或以為糾彈之義云

候王化基草制詞

何績太平興國中任秘書丞度支制官王化基任著作郎
開封推官績一日在省夢入官府如中書制勅院官吏憧
憧出入皆若有所除授其中喜者沮者相半皆形于色績
見衆人紛紛亦前詢問到一房見朱衣吏據案而坐簿書
堆積如堂後官之狀績因前揖之問曰衆人皆除改某與
數否朱衣若有所閱視徐曰亦有但候王化基草制詞因

出而夢覺遂言于化基未幾化基果超擢知制誥又數月
續授虞部員外郎出知荊州官誥果化基之詞

劉悅

劉濤宿梓潼祠下夢與舉子數百趨禁中聽唱名于集賢
殿俄有一衛士來曰公第三人及第濤問曰劉濤耶衛士
曰非也已而傳臚則劉悅也遂驚覺至元祐詔書若與上
書邪人同姓名者聽改名時有彰信軍進士劉濤例因改
名乃憶昔夢改濤為悅果中蔡疑榜第三人

靈應集

須求元公

王汾作館職忤王安石乞外任不許夜夢人告之曰子欲

得郡須求元公時元厚之為參政汾往求之厚之曰介甫
意思不婉順未可議也然介甫屢爭事不合恐旦夕出矣
姑俟之未幾安石果出知金陵汾竟得兗州不惟厚之之
言驗而充字亦元公也

逢丁可

常州丁逢夢人告曰汝欲得第須逢丁可逢以為丁歲乃
改名逢期欲應之至隆興元年省榜出果有天台丁可姓
名然度其官未應作試官也及軋道元年秋試丁可待闕
家居漕使聘為考官逢自慶必得矣無何可以病出院逢
大懊惱然出榜則有名究其故乃可去時執一卷囑他試

官云自得此卷便擬寘前列願勿遺之雖死亦瞑目及會
卷時各有所主不暇為計也適已取一卷犯諱當斥遂以
逢卷補之亦由可力云

當同陳臯

魏清累舉不第將入試夢人云當同陳臯是年臯第五而
清下第後三載清亦第五計臯與清得第皆第八舉矣始
臯為餘干尉至此任滿亦除餘干尉適交代焉

已名及惠純夫

陳正居國子監候紹興壬子試夜夢登一大堂挂黃榜於
梁間問之人云此明春榜也正欲觀之為風飄颺不定徬

佛但見已名及宜興惠純夫耳迨明年試後路遇宜興報
捷人因問云貴縣有誰其人附耳語以純夫正大喜躍未
幾捷音果至夢談

名上朱汚

顧太守禎夢其弟福中榜名上朱汚以語福及福自觀榜
名乃在糊縫鉗印處為朱濺焉後福官至叅政夢談

楊邁金

林邑謂紫磨金為上金俗謂之楊邁金楊邁母夢人鋪楊
邁金席與其生兒兒生席色昭晰後因名兒曰楊邁為林

邑王林邑記

濮陽聯名

楊敬之任江西觀察使其子戴隨任江西應舉時敬之夢
新榜四十進士歷歷可數寓目及半其子在焉其鄰則姓
濮陽而名不可別既寤大喜訪於詞場則云有濮陽原者
為文甚高且有名譽遂尋其名則曰閩人一日楊祖客灞
上客未至俟于逆旅有自遠來者試詢之乃貢士也偵所
自曰自閩問其姓曰濮陽審其名曰愿楊公曰吁斯天啓
也遂命相見濮陽逡巡不得讓執所業以進閱其人眉宇
清朗詞氣安詳其文體理精奧問所寓則曰今將僦居楊
令盡驅其行李置于庠序命戴與朝夕同處是冬大稱濮

陽藝學于公卿間人情翕然得第必矣而濮陽一夕暴卒
楊惋痛嗟駭搜囊得資力為營辦歸骨閩間仍謂其子曰
我夢無徵汝之一名亦不可保明年其子及第而同年竟
無濮陽者夏首將題選于吏部時宰相有言前輩重族望
輕官職是歲慈恩寺題名咸以族望題畢楊間步塔下仰
視之曰弘農楊戴濮陽吳當恍然如夢中所覩云唐闕史
去之自當通泰

宋嶽十舉而名未搆大中十一年將取府解晝寢似有人
報云宋秀才若頭上戴山無因成名但去之自當通泰覺
來便思去之不可名嶽遂去二犬乃改為言及放榜以第

四人及第

雲溪友議

火山軍

歐陽脩與試事主司或夢火山軍得名後歐所取卷乃劉

輝也

筆談

更名穎叔

曹熙夢之官府見有曹穎叔名遂更名穎叔字秀之後以

進士及第歷官天章閣待制

宋書

書簿名槩

趙槩初名裡嘗夢神人金書名簿有趙槩者遂更名應之
後登進士第歷官至吏部尚書為宋名臣云

汝是大吳

蘇文忠軾年十四時夢人謂曰汝是大吳後得第卷上乃

吳字號也

夢談

漢將軍鄧禹

范祖禹之母有娠夢一異人入寢室自稱漢將軍鄧禹故

生而以祖禹名焉卒為宋名臣云

宋書

老人星見

臧愚字仲回少孤嘗夢其父召於庭向空指曰老人星見
矣因望而拜既寤私喜以壽星出丙入丁乃改名丙字夢

壽後官至諫議大夫知江陵府卒壽五十三

宋書

名姓

韓琦

元絳叔赴試夢至一堂榜曰侍中堂堂中列人姓名有韓琦字時師未第後果拜相

第二人孫抃

孫夢得初名貫字道卿嘗語人曰某舉進士過長安夢登塔見持一大文卷者問之云來年春榜索而視之不可問其間有孫貫否曰無惟第三人有孫抃既寤遂改名抃字夢得明年果得第第三

東齊記事

涓涓不絕

馬涓之父從政中年未有子買一妾見其約髮以白絲而

以絳絺蒙之詢其故乃父母死不克葬故自鬻遂遣還不責所負後夢一翁謝曰我君向所買妾之父也聞之上蒼矣願君家富貴涓涓不絕及生子因以夢中語名之曰涓後中元祐辛未狀元

春渚記聞

弓輿不得

弓輿潭州人乾道四年冬偕鄉里六七十人赴省試過宜春謁仰山祠祈夢輿夢至官府見柱揭紙一片書弓輿不得四字但不字稍聯接上下而中乃空既覺殊不樂自謂必下第及入試輿中選同祈夢者盡黜始以語人謂夢不驗好事者曰不字斷乃一个也神言弓輿一个得耳

名姓

陳德遇

江南右藏庫官陳居讓字德遇直宿庫中其妻在家忽夢二吏手把文書自門而入問此陳德遇家耶曰然德遇何在曰在庫中吏將去妻追呼之曰字德遇耳同里有主亦庫官亦姓陳名德遇者家近在東曲二吏相視而嘻曰幾誤矣遂去數日名德遇者晨起如廁自云有疾還臥良久遂卒

稽神錄

胡蘆

一士人至九仙廟祈夢初夢仙語之曰胡蘆未生其年下第後及期再往祈之則夢仙曰胡蘆已生是年又下第又

及期祈之則又夢仙云胡蘆未成是年又下第其士人偃蹇不復往祈亦不得第一日為同儕所拉復往祈之夢仙云胡蘆已成士人驚寤向同儕言之俱不能解是年遂得第觀榜其前一人姓胡後一人姓蘆皆弱冠計其年則始祈夢時皆未生也聞者莫不神之且知功名遲速有定數云

孔老人

文温州林將之任祈夢於九仙廟夢中語以問孔老人文既寤殊不解及蒞任命工解板修官船其督工老人姓孔方解板竟向文稟復林心已訝之乃問其數孔云板止五

名姓

十七塊又問之曰止此無餘矣時文年五十七聞言大驚便覺背上有芒刺不崇朝而疽發背上卒温州仲子待詔公手書其事墨蹟存焉

高嵯峨在何處

都太僕穆初習舉子業尤攻古文托閩人黃體忠代祈九仙夢夢神謂曰高嵯峨在何處後以古學受知於新昌何巡撫鑑乃為推轂於莆田林督學塘遂應南都試中弘治乙卯舉人而本房則高學諭士達始悟高與何二姓為應夢云

狀元名鼎臣

顧文康父嘗夢名鼎臣者為狀元初欲以是名其孫潛不果乃命其少子是為文康云

登杜正榜

少傅余公有丁嘗夢登杜正榜進士既第以為夢不驗矣及榜首申公入領袍笏其典之者內臣杜正也是夢亦巧矣哉

大風吹塵

詳天象部黃帝

號之曰牛

詳天象部穆子

名姓

名之曰蘭

詳品物部鄭伯

立於石上

詳棟宇部鄭僑第一次溫陵石也

勵改為礪

詳什百部楊礪

更名宗儒

詳聖賢部黔南軍

夢占類考卷七

夢占類考卷八

長洲張鳳翼伯起編

文翰部

經 道士布易六爻

虞翻初立易注奏上曰臣聞六經之始莫大陰陽是以伏羲仰天懸象而建八卦觀變動六爻為六十四以通神明以類萬物臣高祖父故零陵太守光少治孟氏易曾祖父故平輿令成續述其業至臣祖父鳳為之最密臣先考故日南太守歆受本於鳳最有舊書世傳其業至臣五世前人通講多玩章句雖有秘說於經疏闊臣生遇世亂長於

文翰

軍旅習經於枹鼓之間講論於戎馬之上蒙先師之說依
經立注又臣郡吏陳桃夢臣與道士相遇放髮披鹿裘布
易六爻燒其三以飲臣臣乞盡吞之道士言易道在天三
爻足矣豈臣受命應當知經所覽諸家解不離流俗義有
不當實輒悉改定以就其正孔子曰乾元用九而天下治
聖人南面蓋取諸離斯誠天子所宜協陰陽致麟鳳之道
矣謹正書副上惟不罪矣 吳志

與鬼爭義

崔浩奉詔學天文星曆易式九宮專心思書忘寢與食乃
至夢與鬼爭義遂得周孔之要術 北魏史

易有太極

王勃嘗讀易夜夢若有告者曰易有太極子勉思之寤而
作易發揮數篇 唐書

小戴禮

宋庠字公序開封雍丘人父杞嘗為九江掾與其妻鍾氏
禱於廬阜鍾夢道士授以書曰以遺爾子視之小戴禮也
已而庠生他日見許真君像即夢中見者庠天聖二年舉
開封禮部皆第一歷官叅知政事

手授六經

黃澤嘗夢見夫子以為適然而屢夢見之最後乃夢夫子

手授所校六經字畫如新由是感發揭六經疑義以示學者

元史愚以迂儒附會造為此夢以驚世駭俗亦不可知但見正史故并筆之

賦可為大人賦

司馬相如將獻賦而未知所為夢一黃衣翁謂之曰可為大人賦言神仙之事賦成以獻帝大嘉賞

西京雜記

鑄鼎象物賦

劍門張惡子廟號英顯王其靈響震三川過者必禱焉西蜀二舉子過廟下時已昏晚大風雪不可行因禱神祈夢就廡下席地而寢入夜風雪轉甚忽夢廟中燈燭如晝殺俎甚盛人物紛然往來俄傳導自遠而至聲振四山皆岳

瀆貴神也既就席賓主勸酬如世人舉子大懼已無可奈何潛伏暗處觀焉酒行忽一神曰帝命吾儕作來歲狀元賦當議題一神曰以鑄鼎象物為題諸神同一韻且各刪潤彫改商確久之乃畢朗然誦之曰當召作狀元者魂魄授之二子默喜私相謂曰此正為吾二人而發迨將曉見神各起致禮傳呼出廟而去視廟中寂然如故二舉子素聰警各盡記其賦亟寫於書帙後無一字忘相與拜賜鼓舞而去倍道前行就試至御試二舉子分就東西廊分坐東西廊題果鑄鼎象物賦韻脚盡同東廊中下筆思廟中所書懵然不能記聞過西廊問之西廊者望見東者來曰

御題驗矣我乃不能記其文欲起問子幸無隱也東廊者
曰吾正欲問子也於是二子交相怒曰臨利害之際乃見
平生且此神賜而獨私以自用天其福爾耶各憤怒不得
意草草信筆而出及唱名二舉子皆被黜狀元乃徐奭也
二舉子後見奭作比夢中所記無一字異二子嘆息始悟
凡得失皆有數遂皆棄去入山

詩
池塘春草

謝惠連十歲能屬文其兄靈運云每有篇章對弟惠連輒
得佳語嘗於永嘉西堂賦詩不就夜夢惠連得池塘生春
草之句 謝靈運集

倚戶授詩

祖珽嘗得罪斛律光珽省事褚士達夢人倚戶授其詩曰
九升八合粟角斗定非真堰却津中水將留何處人寤以
告珽珽占之曰角斗斛字津却水何留人合成律字非真
者謂斛律待我不實也由是謀害光 北史此夢疑士達造
成以嚇珽不然亦光

合為珽所
中傷也

王由賦詩

後魏盧元明與王由友元明夢王由携酒就之言別賦詩
為贈及覺憶其詩十字云自茲一去後朝市不復遊盧元
明歎曰由性不狎俗旅寄人間乃有今夢詩復如此必有

他故經三日果聞由為亂兵所害尋其亡日乃是發夢之夜
夢記

白駒空谷

杜牧夢書行帑曰皎皎白駒在彼空谷寤而歎曰此過隙也吾生於角徵還於角為第八宮吾之甚厄也予自湖守遷舍人木還角足矣其年以疾終年五十

曲終人不見

錢起夢中得句云曲終人不見江上數峰青寤而不知所謂及廷試以湘靈鼓瑟命題詩成無佳結語忽憶夢中二句遂用之因得第一內批二語若有神助

南嶽神責詩

唐彭城劉山甫中朝士族也其父官於嶺外侍從北歸舟泊於青草湖登岸見有北方天王祠因詣之見廟宇摧頽香火不續因題詩曰壞牆風雨幾經春草色盈庭一座塵自是神明無感應盛衰何得却由人是夜夢為天王所責自云我非天王南嶽神也主張此地何為見侮俄而驚覺風浪暴起殆欲沉溺遽起悔過然後方定
山甫自序

紅牋題詩

崔淑娶李續女一夕夢李氏立於牀西執紅牋題詩一首笑授淑詩言莫以貞留妾從他理管絃容華難久駐知得

幾多年夢後纔一歲李遂卒

酉陽雜俎

五

納涼館宇聯句

鄭顥登進士第授右拾遺內供奉尚宣宗女萬壽公主拜
駙馬都尉歷刑部吏部侍郎當大中時恩澤無對嘗於壽
昌節赴麟德殿上壽迴憇於長興里第昏然晝寢夢與十
數人納涼於別館館宇蕭灑相與聯句既寤不全記諸聯
唯省十字云石門霧露白玉殿莓苔青乃書之於楹私怪
語不祥不敢言於人不數日宣宗不豫廢朝會及宮車上
仙方悟其事追惟顧遇續石門之句為十韻云間歲流虹
節歸軒出紫扃奔波陶畏景蕭灑夢殊庭境象非曾到崇

巖昔未經日車鳥斂翼風動鶴飄翎異苑人爭集涼臺
不停石門霧露白玉殿莓苔青若匪災先兆何當思入冥
御爐虛仗馬華蓋負云亭白日成千古金滕閱九齡小臣
哀絕筆湖上泣青萍未幾顥亦卒

慈恩寺聯句

元微之以御史奉使劔外踰旬白樂天與弟行簡同遊曲
江慈恩寺諸院命酒懷元聯句云年來無計破春愁醉折
花枝當酒籌忽憶故人天際去計程今日到梁州實二十
一日也後元使至元寄書及紀夢一詩云夢君兄弟曲江
頭也入慈恩院裏遊屬吏喚人排馬去覺來身在古梁州

參寥誦詩

蘇軾在黃州夢參寥誦所作新詩云寒食清明都過了石
泉槐火一時新曰火固新矣泉何故新荅曰俗以清明日
淘井非新泉乎 志林

杜甫誦詩

狄遵度好為古文尤嗜杜甫詩一夕夢甫為誦世所未見
詩及覺纔記十餘字遵度足成之為佳城篇

神女謝詩

長汀吳簡言以茂異決科累官祠部郎中嘗經巫山神女
廟題詩云惆悵巫娥事不平當年一夢是空成只因宋玉

間唇吻流盡巴江洗不清是夜簡夢神女來謝詩 八閩志

示詩意

全樂先生夢人示詩云人事且常在留質悟圓間東坡廣
其意圓間有物物間空空有圓空入井中

和來篇

韋檢舉進士不第常有美姬一日捧心而卒檢痛悼不勝
情舉酒吟一詩曰寶劍化龍歸碧落嫦娥隨月下黃泉一
杯酒向青春晚寂寞書窓恨獨眠一日夢姬曰其限於修
短不盡箕箒當有後期今和來篇口占曰春雨濛濛不見
天家家門外柳和烟如今腸斷空垂淚歡笑重追別有年

檢終日悒悒後更夢姬曰卽遂相見覺來神魂恍惚乃題
曰白浪漫漫去不迴浮雲飛盡日西頽始皇陵上千年樹
銀鴨金鳧也變灰無何檢亦卽世

芥情錄

禁中曉寒歌

蕭貫自知饒州遷兵部員外郎召還將試知制誥適感疾
夢綠衣中人召至帝所授以衍波牋命賦禁中曉寒歌既
寤筆之詞語清麗未幾卒人比之李賀云

宋史

東吳詩

楊備天聖中爲長溪令忽夢作詩云月俸蛟錢數甚微不
知從宦幾時歸東吳一片輕波在欲問何人買釣磯意甚

異之明道初爲華亭令丁內艱遂過吳中樂其土風乃效

白樂天作我愛姑蘇好十章因卜居焉始悟前夢中語爲

有徵

姑蘇志

崔球妻詩

崔球久居太學夢歸見其妻秉燭寫詩相寄詩曰數日相
望極須知志氣迷夢魂不怕險飛過太江西後得來詩卽
夢中之句夢之夕修書時也

彤管遺編

范文正遺詩

羅太史倫江西吉安人赴禮闈道蘇州爲文謁范文正公
祠是夕宿舟中夢文正公遺之詩曰賜帶橫腰重宮花壓

帽斜勸君少飲酒不久臥烟霞已而及第以文章氣節著
聲宦竟不達一如詩意云

石田雜纂

傳 讀楊阜傳

吳奎將舉賢良夢入魏文帝廟升殿問群臣優劣奎對曰
韓延壽為最是夕門下抄書吏楊開者亦夢奎讀楊阜傳
翌日告奎奎覽二傳及試六論一乃韓延壽楊阜孰優奎
果中首選

澠水燕談

記 白玉樓記

李賀夢人持版告曰天帝白玉樓成請君為記寤以語其
母不久有烟氣起賀卒

劉禹錫集

紫府瓊臺記

蔣文學燾為樂亭令遺胎母方在蓐恍忽見道流三人入
房便失其一燾在襁褓神穎能言九歲治四書易皆通十
一入為府學生十四應鄉薦不捷而聲轉蜚丁巳之歲其
年十六冬月將盡一旦枕上呼母曰母寧知帝京有紫府
瓊臺乎母曰不知又曰兒嘗以母老辭歸可乎母訝其不
倫且謂囁語置不問至元日其姊夫劉玠入燾齋見易書
中有書紙千百言取觀乃燾所記前夢事其初曰某年月
日夢老父引登高境曰紫府瓊臺撰文曰翠碧重華玉殿
金闕其末曰燾再拜泣請家有老母乞放歸養姑還云云

八卷之八
九
峴未及讀中文燾適來奪之毋亦來取視燾窘遽云毋毋
觀泄天中機毋惡之抵于地燾遂拾置冊中其年三月十
一日燾竟卒 祝京兆集

題省 省題行王道而王

唐大曆中夔州推司楊旬有子將入試旬夢金剛神謂曰
汝陰隲有感吾特來報汝子須改名楊椿塲屋中吾助子
旬既覺即令子改名納卷遂中第六次年赴省試椿復自
夢神語云曰今年省題是行王道而王可留心焉放榜中
九十六及廷試得狀元及第州守聞捷召旬令解職旬曰
旬奉公四十年家惟留得三慳囊取來觀之其一有當三

錢三十九其二有折二錢九百七十五其三有小錢千餘
守問其故旬曰旬每年承鞫勘公事詳其情理稍輕者死
改為流即投一當三錢流改為徒投一折二錢其應杖而
從輕釋放者投一小錢今兒得叨第一亦奉公行善所致
也敢退職求自逸耶 餘慶編

討究孟享一事

蒲咸臨于宣和癸卯冬夜宿荆山驛夢一老衣冠甚偉自
云是王安石探懷中數簡與之云宜先討究孟享一事至
紹興壬戌秋以繁江尉充御容殿香火官四時孟享實與
行事始符夢焉 荆山夢記

神聖有作

紹興乙卯新城吳中赴鄉試其兄在家夢中歸自云經義中用神聖有作句大愜意其兄志之壁間及中式歸兄問以經義中曾作神聖有作語否中云有之然未嘗示人兄何以知兄語以夢引觀壁間字相與歎異

祭春牛文

元豐六年十一月二十七日蘇文忠軾夢數吏持一幅紙上題云請祭春牛文乃書云三陽既至庶草將萌爰出土牛以戒農事衣被丹青之好本出塗泥成毀須臾之間誰為愠喜餘冬序錄

典司文翰

宋黃伯思至京夢人告曰子非久人間上帝有命典司文翰覺而書之不踰月而卒餘冬序錄

書 東有二角書

索綏夢東有二角書詣綏大角朽敗小角有題韋囊角佩一在前一在後問索統統曰大角朽敗腐棺木小角有題題所詣一在前前凶也一在後後背也當有凶背之間時綏父在東居三日而凶問至史

惟留一角書

周琬將赴闕再調至澤州宿次夢一朱衣吏云南嶽大王

召君既登殿請拜王曰知負外將入調吾欲辟在此中與人間不殊且無衣食之累何如琬辭王乃賦詩送之云住此既非樂舍此去何圖若問青氈事惟留一角書琬覺異之至京邸即臥病自知不起乃力疾作家書纔一角封訖便卒

名賢雜錄

授一卷書

江南校書周延翰性好道頗修服餌之事嘗夢神人以一卷書授之若道經然其文皆七字為句唯記其末句云紫髯之畔有丹砂翰寤而自喜以為必得丹砂之效然翰有一婢名丹砂未遣後竟無所得以疾卒夢意似有徵云

廣

異記

賜天書

真宗嘗夢神人言賜天書於泰山即密諭王欽若欽若因得之授中使馳捧以進遂成封禪禮

宋史此夢似欽若輩為之未必真有也以

見正史故存之以為辨惑之助云

神人示以文書

蕭燧未第時夢神人示以文書記其一聯云如火烈烈玉石俱焚在冬青青松柏不改後以進士高第不為秦檜子燧所污仕孝宗朝累遷左司諫上以議論鯁切不求名譽糾正奸邪不恤仇怨嘉獎之後以資正殿學士與郡卒謚

文翰

正肅果符前夢云

宋史

美人手執一帋書

吳女名盈盈平居醉臥夢紅裳美人手執一帋書曰玉女命汝掌奏牘及覺泣以白毋云女不復久居人間矣他日可訪我於東山其夕果卒

文選一部

宋祁父玘夢一偉人遺文選一部而生祁故小名選郎

父書亟來

詳彙倫部唐伯虎

志

改正墓志

吳中有一士人夢待詔文公徵明據案簡閱手不停披士人問公何匆冗若此公云我生前為人據狀作墓志不無溢美今上帝命我改正不得片暇殊苦之又云不久大郎來幫我我便易完矣時國博公彭方官京師予董聞說此夢甚惡之且謂其非真無何國博方請休竟以小疾不起乃知此夢不誣云

銘

書新宮銘

蔡少霞夢人召書新宮銘曰紫陽真人山玄卿撰

虞初志
詳呼召

藝

碁經三卷

僖宗自普王卽位幼而多能素不曉碁一夕夢人以碁經

文餘

卷之八

十二

三卷焚而使吞之及覺命待詔觀碁凡所指畫皆出人意
補錄紀傳

字
兩人時相教授

江式少專字學數年中嘗夢兩人時相教授及寤每有記
識北史

呂走人向主

申宗慕從燕公于謹征梁既陷荆州夢二青衣示之以呂
走人向主五字乃詣占夢者於江陵市曰呂走迴字也人
向主住字也子不復往乃壽時留兵屯江陵慕遂陳情於
拓跋烈許之

丹篆一卷

韓文公愈夢人以丹篆一卷與吞之旁一人撫掌而笑後
見孟郊乃撫掌笑者

江中沙石為篆籀文

王仁裕初事蜀蜀平歷事唐晉漢以翰林學士屢遷戶部
尚書其少也嘗夢剖其腸胃以西江水洗之顧見江中沙
石皆為篆籀之文由是文思益進乃集其平生所作詩萬
餘首為百卷號西江集竟以文章知名當世 五代史

冒子中三古字

淳熙中汪應辰起為大宗伯汪有一友屢黜於禮闈甚念

文翰

天卷之八

二

之將就道以書約會於富陽一蕭寺中夜對榻密語云某此行或典貢舉頭場冒子可用三古字以此為驗其友感喜應辰果知舉搜易卷有冒子用三古字者置之前列及拆卷非其友人也竊怪之數日其友來見怒責之曰輕名重利售之他人何相負如此友人指天日誓曰某以暴疾幾死不能就試何敢泄於人汪終不釋然未幾以古字得者來謁因問之曰子冒子中用三古字何也對曰茲事甚怪某來就試假宿於富陽某寺中間步廡下見室下一樞塵埃漫漶僧曰此一官員女也殯於此十年矣相與嗟悼是夕夢一女子行廡下謂某曰官人赴省試妾有一語相

告頭場冒子中可用三古字必登高科但幸勿相忘使妾朽骨得早入土既覺甚怪之遂用其言果叨前列近已往寺中葬之矣汪聞其說驚歎觀此事足以祛人二蔽一則功名富貴信有定分有則鬼神相之無則雖主舉欲相牢籠至於場屋不能入此豈智巧所能為乎一則人發一念出一言雖昏夜暗室人所不知鬼神已知之矣彼自欺於冥冥而曰莫予覩者惑之甚也

臨林玉露

今年垂字作魁

胡仲徽已卯秋以兼經就試郡學有一士子夢人語曰今年垂字賜作都魁覺以語人莫曉所謂是歲以天子與日

月並明命題以天子無私明並口為韻滿場第一韻押
明字胡獨押私字前兩句曰聖高拱天光下垂考官擊
節歎賞遂寘首選

濮字方丈

安守忠嘗夢一濮字方丈餘及仕宋歷漢州刺史開寶初
改濮州又拜濮州團練使凡領濮郡前後幾二十年宋史

篆書數百字

王九夢老人教以篆書數百字後嘗為玄道歌言脩煉之
要太宗召赴闕賜道士服賜名趙自然遣還真宗召至闕
得賜紫衣或云篆書符錄云宋史

愁字

孟蜀進士蘇協宿聖壽寺夢入官廨屏上大書愁字廳後
復見秘器甚高大既寤心惡之占夢周世明曰吉徵也蓋
愁者不樂也不樂即不落之意秘器為棺而高大子孫當
有至大官者是年協果得第及歸宋其子易簡以狀元及
第後叅大政符所夢云燕間錄

朱書大字二行

淳化癸巳冬李君房至餘杭患瘡瘍謁伍大夫廟見有梅
數株已爛熳矣是夜夢上一山見道士運籤牌君房間之
道士乃抽一牌朱書大字二行云時來自有期此去不憂

運行心但如此不久銷疾病君房喜而別既下山聞梅花
香回望其上乃昨所見也既覺瘡瘍漸愈後知錢塘作文
志之 靈夢志

寫一奇字

楊祿女幼夢堂有大扁寫一奇字驚寤言於父母至年二
十一時嘉熙戊戌有趙時奇登第方二十二未娶來議婚
父母以名應夢兆遂許之 夢談

書一蘇字

高啓長於詩文一夕夢人執其手書一蘇字又謂爾必見
殺於此人啓訝之凡蘇姓者皆不敢殺見後本府太守魏

觀嫌府居於衛之右不稱文東武西遂遷於張士誠故廢
基衛官惡之誣奏太守欲復王業 上召至京斬之啓為

作上梁文亦棄市

明興雜記一說是王彛夢其祖書一
魏字於心與此少異并識以俟參覈

成不成成平不成平

一儒生至九仙廟祈夢夢中一人語曰成不成成平不成
平清水橋邊乃見分明此生久不遇每憶此夢然卒不知
所謂也一日過一橋上題曰清水橋生訝焉頃之有一老
父至生乃述所夢以問之父曰生今年得矣成不成成戊
字也平不成平午字也今年戊午將無徵乎已而果然

對 雨打無聲鼓子花

馬鐸初與邑人林誌同學鐸自知其不及誌鄉試會試誌皆第一比殿試之夕誌夢有馬奪其首誌始懷疑既而傳臚馬果第一誌第二甚怏怏不服每欺鐸汝沒學問狀元何以居我上一日互爭於廷殿上聞知乃曰朕試汝等一對對佳者即為真狀元矣其對題曰風吹不響鈴兒草鐸應聲曰雨打無聲鼓子花殿上大稱許誌想踰時竟不能對遂愧服蓋鐸幼時夢中有人語之曰雨打無聲鼓子花不知何謂至是用之蓋天設也不然何以屈林誌邪義命

錄

筆
大筆

晉王珣孝武時為左僕射夢人與大筆如椽覺語人曰當有大手筆事俄帝崩哀冊謚議皆珣草晉書

郭璞索筆

江淹嘗宿於冶亭夢一丈夫自稱郭璞曰吾有筆在卿處多年可以見還淹探懷中得五色筆一授之爾後為詩絕無美句人謂才盡齊書與張景陽索錦事相類

青縷管筆

紀少瑜年十二能屬文一夕夢陸倕以一束青縷管筆授之云我以此筆猶可用卿自擇其善者其文自此迺進南

史

文

五色筆一束

和凝年十七舉明經至京師忽夢人以五色筆一束與之謂曰子才可以舉進士自是才思敏贍十九登第

一小筆

魯人廉廣採藥泰山遇一人授以五色筆囑以畫意而畫便通靈偶下邳令請廣畫廣因告以其事令請廣畫一龍畫纔畢雲蒸霧起飄風倏至龍忽乘雲而上連雨不止令擬廣有妖術收廣下獄窮詰之廣於獄內號泣追告山神其夜夢神與言曰君當畫一大鳥叱而乘之飛即免矣廣及曙乃密畫一大鳥叱之果展翅廣乘之飛直至泰山而

下復夢神曰君言泄固宜有厄本與君一小筆欲為致福反乃取禍今當見還廣懷中探筆還之神忽不見廣亦不復能畫

大唐奇事

神遺雙筆

李嶠為兒童時夢有神人遺之雙筆自是漸有文弱冠舉進士聖曆初累轉鸞臺侍郎平章事神龍初為中書令

筆生花

李白夢筆生花自是才思日進

神授二筆

五代唐末帝時馬裔孫赴闕宿羅府其地有神祠夜夢神

手授一筆及為翰林學士裔孫以為契夢筆之兆洎入中書上事堂吏奉一筆如夢中所授者

太平廣記

童子投紙筆

釋窺基遊五臺山登太行至西河古寺宿夢身在半山巖下有無量人唱苦聲不忍聞步陟層峰皆琉璃色見諸國土有二童自城中出問汝見山下罪苦衆生否荅曰我聞聲而不見形童子遂投與一劔曰剖腹當見矣基自剖之有光兩道暉映山下見無數人受苦童子投紙筆入城而去基驚異明日於寺得彌勒上生經遂援毫書之又造文殊像寫大般若經皆獲瑞應

神僧傳

日光射身人授筆

楊奐母嘗夢東南日光射身旁一神人以筆授之已而生奐其父以為文明之象因名之曰奐字煥然後以文學政事為元名臣謚文憲

元史

袖中龍頭筆一枝

曾學士彥每科試輒夢袖中龍頭筆一枝以手取之則筆入內弗得至成化戊戌復夢如故取筆出之文彩焜耀儼一龍在手果狀元及第

義命編

楊文貞授綵毫

彭學士時嘗夢楊文貞授以綵毫拜而受之及掄魁掌誥

制足紹文貞云

筆點額

詳人身部北齊宣

硯遺以大硯

錢儼少夢人遺以大硯自是樂為文辭頗敏速富贍當時國中詞翰多出其手後歸宋亦多述作云

紙紅箋剪數寸

蘇檢登第歸吳省家行及同州澄城縣止於縣樓上醉後夢其妻取筆硯篋中取紅箋剪數寸而為詩曰楚水平如鏡周迴白鳥飛金陵幾多地一去不知歸檢亦裁蜀箋而

賦詩曰還吳東去下澄城樓上清風酒半醒想得到家春欲暮海棠千樹已彫零詩成俱送于所臥席下又見其妻笞檢所挈小青及寤乃於席下得詩視篋中紅箋亦有剪處小青其日暴疾已而東去及鄂岳登舟小青之疾轉甚去家三十餘里乃卒夢小青云瘞我北岸新塋之後及殯于北岸乃遇一新塋依夢中所約瘞之及歸妻已卒問其日乃澄城縣所夢之日謁其塋乃瘞小青處前塋也時乃春暮其塋四面多是海棠花云聞奇錄

衍波箋

詳本部蕭貫

文翰

墨

失墨蒙責

荆南節度使高保融有疾幕吏孫光憲夢在渚宮池與同僚偶坐而保融在西廳獨處唯姬妾侍焉俄而保融弟保勗見召上橋授以筆硯令光憲指為發軍仍遣廳頭二三子障蔽光憲不欲保融遙見遂巡有具橐鞬將校列行俟命次見掌節使嚴光楚鞞而前趨手捧兩黑物其一則如黑漆鞞而光其一卽尋常鞞也謂光憲曰其曾失墨兩挺蒙王黜責今果尋獲也良久夢覺翌日說于同僚踰月而保融卒節院將嚴光楚具帖子取處分倒節光憲請行軍司馬王甲判之墨者陰黑之物節而且黑近於凶象卽向

之所夢倒雙節之謂也

北夢瑣言

圖書狀元及第圖書

宋有衛狀元涇名臣也其祠在邑中初顧文康鼎臣入品庠夜夢一人紫袍象簡稱衛姓携狀元及第篆文圖書貺之每過其祠虔誠謁拜一日鄉間儒生入城假宿於祠中似聞神女云明日有狀元顧鼎臣來儒生謂庠中無此人早起俟何人至忽見諸生顧同入語以此事顧曰吾正將易此名矣

音樂部

樂

鈞天廣樂

音樂

秦穆公夢至帝所觀鈞天廣樂帝錫之以策秦遂大昌史記

諸天妓樂盈空

馬處伯少年信佛法嘗作宣漢縣令元嘉丁丑七月夜夢見天際有三人長二丈餘臨雲下觀諸天妓樂盈於空中告曰汝厄在荆楚戊寅之年八月四日若處山澤其禍克消若過此期當悟道也處伯後為梁州西曹掾州將蕭思話轉南蠻復命為行參軍處伯思荆楚之言懼求解職將適衡山蕭不許明年即戊寅歲也六月末得病至八月危篤一日忽朗然徹視遙見西方有三長人列於空中去地

數仞詳視之即前所夢者也頃之不見同居小大皆聞香氣因而流汗病即平復冥祥記

有音樂處

唐玄宗夢二十七仙人云我二十八宿也一人寓直在天不下我等寄羅底間三年矣玄宗問羅底所在仙云有音樂處是也詔訪焉於寧州東南五里地名羅川之上有山山有洞穴翳翳不可通惟樵牧者時聞音樂乃於此窮之得石室中有石像二十七遂應詔以進神仙感遇傳

仙樂繚繞前後

丁宗伯士美未第時夢坐堂上空中有仙女一群乘鶴翮

然而下人皆作樂仙樂繚繞於前後久之復乘鶴而上須
吏有黃旗二扇豎於門至嘉靖丁未果大魁天下夢若為
之兆云 狀元錄

娛余以上清之樂

詳天象部唐玄宗

鼓

舜擊鼓

舜以上聖符休徵故夢擊鼓

後房鼓震篋篋有鍛工

吳王夫差夢後房鼓震篋篋有鍛工公孫聖曰後房鼓震
篋篋者坐太息也詳地理部

天鼓且動

婁師德未遇時常因沉疾夢一人衣紫來榻前再拜曰君
之疾且間矣幸與其偕去即引婁出忽覺力甚捷自謂疾
愈行數里見有解署左右吏卒朱門甚高曰地府院驚曰
何地府院而在人間乎紫衣者對曰冥道固與人接跡世
人又安得知婁入院吏卒辟易四退見一空室曰司命署
問職何如對曰主世人祿命之籍也婁因竊視之有書數
千幅在几上傍有綠衣者稱為按掾婁命出已之籍按取
一軸以進閱之乃書名載其祿位年月周歷清貫出入台
輔壽至八十有五覽之喜謂按掾曰某一布衣耳無饑凍

足矣又安敢有他望乎言未畢忽有一聲泐空而下震徹
簷宇按掾驚曰天鼓且動君宜疾歸不可留矣遂驚寤時
天已曙其所居鄰有佛寺擊曉鐘蓋按掾所謂天鼓者也
是日疾亦間後入仕歷官咸如所載者及為西京帥一日
見黃衣使者至閣前曰冥途小吏奉命請公婁曰吾嘗見
司命之籍紀吾之位當至上台壽凡八十有五何為遽見
命耶黃衣人曰公任某官時嘗悞殺無辜人位與壽為主
吏所降今則窮矣言訖忽亡所見自是臥疾三日薨

宣室志

鼓吹迎狀元

宋馮京父式商也入粟拜官壯年無子將如京師其妻金
氏授以白金數笏令至京置妾及至都下買一妾立契償
金矣問妾所自來涕泣不肯言固問之乃言其父為官因
綱運欠折鬻妾以償式惻然即遣還其父不索金及歸妻
問買妾安在具告以故妻曰君用心如此何患無子居數
月妻有娠將誕里中人夢鼓吹喧闐迎狀元京乃生

鶴林玉露

鐘磬無故自墜

梁散騎常侍王茂以元勳受鐘磬之賜及為江州刺史夢
鐘磬在格無故自墜心惡之及覺命奏樂既成列鐘磬在

音樂

格果無故編皆絕墮地茂謂長史江詮曰此樂天子所以
勞老臣也樂既極矣能無憂乎俄而病少日卒

下有銅鐘

釋法安夜夢一人近其牀前云此下有銅鐘覺卽掘之果
得鐘二口

神僧傳

石像銅鐘

紹明律崑山慧聚寺僧也居半山彌勒閣一夕夢有神人
曰簷前古桐下有石天王像與銅鐘師宜知之詰旦掘其
地果獲二物制度極古前輩嘗有詩云一旦石像欲發見
先垂景夢鳴高岡

姑蘇志

禪定寺僧鳴鐘

有一人至都中路身亡初無凶告通夢於其妻曰吾行達
彭城不幸病死因生前無善行乃墮地獄備經五苦類今
月初十日禪定寺僧智興鳴鐘發響聲振地獄同受苦者
一時脫解思報其恩汝可具絹十疋奉之并陳意及寤人
無信者後十餘日凶問至乃以絹奉興寺僧咸至問興曰
何緣鳴鐘乃有斯應興曰余無他術見佛法藏傳云彌臈
吒王受苦由鳴鐘得停及增一阿合經鳴鐘作福敬遵此
事勉力行之嚴冬登樓皮肉破裂露手鳴椎不以為苦鳴
鐘之始先發善念願諸賢聖同入道場同受法食願諸惡

趣聞此鐘聲即時離苦而已 異苑

案上黃鐘

楊忠愍繼盛得第後授南京吏部主政時關西韓尚書叅
贊機務於留都其人素精律呂楊遂師之三月而得其數
因自制管琴瑟笙簫填箎諸器皆已和又合諸樂總奏之
如出一律韓喜曰吾學五十年止得其數今賴子制其器
和其音當代之樂在子矣吾欲汝制十二律之管每管各
備五音七聲各成一調何如楊有難色韓強令思之楊退
而欲制漫無可據苦心思索廢寢食者三日忽夢大舜坐
堂上案上設金鐘一命楊曰此黃鐘也子可擊之楊取錘

連擊三恍然而寤呼其夫人燃燈取竹與鋸鑽至明而成
管六至已而十二管成焉以呈於韓韓喜曰刻志樂之日
九鶴飛舞於庭其應在子乎於是南都有知樂之名 楊忠愍年譜

請勿撞鐘

楓橋有一屠戶每夜聽寒山寺撞鐘即起屠猪一日至天
明不聞撞鐘顧視猪圈中一母猪已產心異之向寺問僧
為何昨夜不聞鐘聲僧云我昨夜夢一烏衣婦人向我請
命言師若撞鐘我便當殺我今懷胎未產殺則非止一命
千萬慈悲今夜且勿撞鐘我以夢故不撞鐘耳屠者語以

其家產猪事相與歎異屠者遂改業寺亦不復撞鐘云

鐘虞之間

詳英靈部賈謚

磬 一磬

淮安楊淮赴成化甲午秋試祈夢于都城隍廟夢二磬相
沓初不解是年中式後授重磬府同知始徵夢焉 客座新

聞

琴 處女鼓琴而歌

趙武靈王夢處女鼓琴而歌詩曰美人熒熒兮顏若苕之
榮命乎命乎曾無我羸異日王飲酒樂數言所夢想見其

狀吳廣聞之因夫人而內其女娃羸子無姚也孟姚甚有寵
於王是為惠后 史記

彈琴

鄭述祖能鼓琴自造龍吟十弄云嘗夢人彈琴寤而寫得
齊書

聽琴來

段文昌從弟某者自信安還洛暮達瓜州宿舟中夜彈琴
忽聞有嗟嘆聲及還寢夢一女年二十餘形悴衣敝前拜
曰妾姓鄭名瓊羅本居丹徒父母早亡依於孀嫂嫂不幸
人沒遂來揚子尋姨夜至逆旅市吏子王惟舉乘醉將逼

辱妾知不免因以領巾絞頸自殺市吏子乃潛埋妾於魚
行西渠中其夕再見夢於揚子令石義竟不為理復見冤
氣於江石尚謂非烟之祥圖而表奏抱恨四十年無人為
雪妾父母俱善琴適聽君竒弄不覺來此段尋至河清縣
訪內弟樊元元少有異術忽曰兄安得一女鬼相隨請言
遣之乃張燈焚香作法頃之燈後窸窣有聲元則曰是請
紙筆也即投紙筆於燈影中少頃紙落燈前視之書盈於
幅書若雜言七字辭甚悽恨元則遽令錄之言鬼書不久
輒漫滅及曉紙上若煤污無復字也元則復令具酒脯紙
錢乘昏焚於道有風旋灰直上數尺及聞悲泣聲詩凡二

百六十二字率敘幽冤之意語不甚曉故不載

酉陽雜俎

教琴箏琵琶

安西張氏女國色也嘗晝寢夢至一朱門檠戟衆公卿咸
集出女伎張女與焉且教之琴箏琵琶命歸辭父母既覺
述所夢及期果卒會昌二年十月十五日也

石琴泠泠

陳檢討獻章嘗夢拊石琴其音泠泠然見一偉人笑謂曰
八音中惟石音為難諧今諧若是異日得道乎陳因號石
齋

琵琶授琵琶樂曲

在日樂

蜀節度使王俸義有女許字荆南高從誨之子性聰敏善彈琵琶嘗夢人授樂曲所授之人其狀或道或俗其衣或紫或黃有一夕而傳數曲有一聽而便記者其聲清越與常調異似仙家紫芝之類既適高氏數年而亡咸以為謫墜之人云 北夢瑣言

鈴 綵旗四角懸鈴

梁任昉母裴氏嘗晝寢夢有綵旗蓋四角懸鈴自天而墜其一鈴落入裴懷中心悸動既而有娠生昉昉幼而好學早知名善屬文終於寧朔將軍新安太守諡曰敬子 南史

鐸 曹叔振鐸

詳名姓部曹人

歌曲 童子羸而歌

十二月辛亥朔日有食之是夜也趙簡子夢童子羸而轉以歌旦占諸史墨曰吾夢如是今而日食何也對曰六年及此月也吳其入郢乎終亦弗克入郢必以庚辰日月在辰尾庚午之日始有謫火勝金故弗克 左傳

叔帶哭笑且歌

趙氏之先自中衍為帝大戊御其後孟增幸於周成王造父幸於周繆王奄父幸於周宣王至叔帶之時周幽王無道去周如晉事晉文侯始建趙氏於晉國自叔帶以下趙

音樂

宗益與五世而生趙夙晉獻公賜趙夙耿又再世而生趙衰從重耳出亡凡十九年得反國重耳為晉文公衰為原大夫居原任國政文公所以反國及霸多趙衰計策衰生盾衰卒趙盾代衰任國政是時晉襄公卒太子夷臯立是為靈公靈公驕趙盾驟諫靈公欲殺盾盾亡未出境而趙穿弑靈公而立成公趙盾復反任國政盾卒子朔嗣晉景公之三年大夫屠岸賈欲誅趙氏初趙盾在時夢見叔帶持要而哭甚悲已而笑拊手且歌盾卜之兆絕而後好趙史援占之曰此夢甚惡非君之身乃君之子然亦君之咎至孫趙將世益衰屠岸賈者始有寵於靈公及至於景公

而賈為司寇將作難乃治靈公之賊以致趙盾徧告諸將曰盾雖不知猶為賊首以臣弑君子孫在朝何以懲臯請誅之乃與諸將攻趙氏於下宮殺趙朔趙同趙括趙嬰齊皆滅其族趙朔妻成公姊有遺腹走公宮匿賴朔友人程嬰存孤與俱匿山中居十五年晉景公疾卜之大業之後不遂者為崇景公問韓厥厥知趙孤在乃曰大業之後在晉絕祀者其趙氏乎夫自中衍者皆嬴姓也中衍人面鳥喙降佐殷帝大戊及周天子皆有明德下及幽厲無道而叔帶去周適晉事先君文侯至於成公世有立功未嘗絕祀今吾君獨滅趙宗國人哀之故見龜策唯君圖之景公

問趙尚有後子孫乎韓厥具以實對於是景公立趙武復與趙武田邑如故史記

瓊瑰盈懷而歌

詳珍寶部公孫嬰齊

登樓而歌

詳棟宇部張奐

曲名紫雲迴

唐玄宗夢神仙十餘人持樂器奏於庭奏曲以售請為中原正始之音曲名紫雲迴晨興即以玉笛吹而習之傳於

樂府感遇傳

凌波曲

玄宗在東都晝寢夢一女子容色穠艷梳交心髻大帔廣裳拜於牀下上曰汝是何人曰妾是陛下凌波池中龍女衛宮護駕妾實有功今陛下洞曉鈞天之音乞賜一曲以光族類上於夢中為鼓胡琴拾新舊之聲為凌波曲龍女再拜而去及覺盡記之因命禁樂與琵琶習而翻之遂宴從官於凌波宮臨池奏新曲池中波濤湧起復定因遣置廟於池上每歲祀之逸史

香山曲

李珣子七歲夢王母宴群仙舞者帶研光帽帽上簪花舞

香山曲

香山曲未終百花盡落

仇池筆記一云李陶子

教坊授曲

有崔氏者廣陵倡家生二女性酷嗜音雖貧苦求活常以絃歌自娛有女弟蒞奴善鼓箏絕妙年十七卒人多傷之二女幼傳其藝長女性不甚聰慧母教其藝每被鞭箠心念其姨不能開祐偶夜寐驚起號泣謂其母曰向者夢姨執手泣曰我自辭人世在陰司簿屬教坊授曲於博士李元憑元憑屢薦我於憲宗皇帝帝召居宮後以我更直穆宗皇帝宮中以箏導諸妃主入一年上帝誅鄭注天下大酺唐氏諸帝宮中互選妓樂以進神堯太宗二宮我復得

侍憲宗每一月之中五日一直長秋殿餘日得肆遊觀但不得出宮禁耳汝之情懇我已知之但無由得來近日得出入襄陽公主第公主以我思念私許我歸成汝之願汝早圖之陰中法嚴帝或聞之當獲大譴及寤乃灑掃一室列虛筵設酒果髣髴如有所見因執箏就坐閉目彈之隨指有得初授人間之曲十日不得一曲此一日獲十曲曲之名品殆非生人之意聲調哀怨聞者莫不歔歔母令小女再拜求傳亦備得之至暮決去數日復來曰吾聞揚州連帥取汝恐有謬誤汝可一一彈之又留一曲曰思歸樂無何州府果令送至揚州一無差錯廉察使故相李德裕

議表其事 真音錄

蘇小黃金縷

司馬才仲初在洛夢一美姝牽帷而歌曰妾本錢塘江上住
花落花開不管流年度燕子啣將春色去紗牕幾陣黃梅雨
才仲問其曲名曰黃金縷且曰後日相見於錢塘江上及才仲
以薦應制舉為錢塘幕官其解舍後堂有蘇小墓不踰年而才仲
得疾其常所乘舟柁工見才仲携一麗人登舟即前聲喏而火起
舟尾倉忙走報家已慟哭矣

南呂

解元唐先生寅中歲失意欲知壽數禱神祈夢夢觀一軸

首南呂二字餘不憶覺後亦不能解後至五十外過友人家見堂上一軸似昔夢所覩迫而察之乃是一詞首題云南呂一枝花唐駭而讀之中二句云生年半百前路苦無多唐心知非佳兆也乃以女屬太學王先生寵曰唐生止此一女以許君之子幸善視之吾據夢兆且不久矣未幾即世

蘇小黃金縷



卷之八

三十四

